


09 MARTIE

**ACATISTUL
SF.21 MUCENICI
DE LA CORINT**

ACATISTIER-RU



Акафист святым мученикам Кодрату, Виктору и Галине и многим иным с ними пострадавшим

Кондак 1

Избранным Десницею Господнею от среды нечестивых, воеже чистотою праведнаго жития своего достойными подражателями Христа Господа быти и Тому даже до смерти лютыя верность свою сохранить, святым мученицам Кодрату, Виктору, Киприану, Дионисию, Павлу со святыми женами Галиною, Василисою, Феодорою и со многими иными, с ними пострадавшими, похвальное пение воспоем. Вы же, яко имущии велие дерзновение ко Христу Жизнодавцу, молитвами своими от всяких нас бед свободите да умиленными сердцами воспеваем вам: **Радуйтесь, святии мученицы Кодрате, Викторе и Галино, в страданиях тяжких Христа прославлявшии.**

Икос 1

Архангельския силы на небеси и Боголюбивии людие на земли удивляхуся, зряще, како вы, святии страдальцы Христовы, веру Христову защищая и велия муки за Христа претерпевая, даже до смерти Господу верными оставалися есте, с Ним же ныне райскую сладость вкушаете. Мы же, многострадальными подвигами вашими в вере и в любви к Богу утверждаяся, зовем таковая:

Радуйтесь, от мглы языческаго ко свету Христову пришедшии.

Радуйтесь, светом тем сердца своя просветившии.

Радуйтесь, души своя мучениями за Господа очистившии.

Радуйтесь, Евангелие Христово неустрашимо проповедавшии.

Радуйтесь, Духом Святым очищеннии.

Радуйтесь, души своя Господу в жилище нетленное уготовавшии.

Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 2

Видя мати твоя Руфина, блаженне Кодрате, яко велие гонение бысть на христианы, из града Коринфа в горы бежаше и от преследователей своих тамо спасашеся, идеже роди, ты, сына своего, и вскоре по рождестве твоём душу свою чистую Богу предаде. Промыслом Божиим сохраняемый и росю небесною питаемый, ты, святе Кодрате, возрастая и укрепляясь, Богу воспевал еси: **Аллилуиа.**

Икос 2

Разумом своим постигнути вся величия Божия не могущаго, к истинным христианом приведе тя Господь, богоносне Кодрате, да светом истинных веры просветишися и послежде ученики своя научати будеши. С нимже приими от нас пение сие:

Радуйтесь, всею душею Господа взыскавшии.

Радуйтесь, в сердца своя Господа приявшии.

Радуйтесь, от стези ко Христу ведущей не уклонившиися.

Радуйтесь, паче всех благ земных Господа возлюбивши.
Радуйтесь, своим житием Творца прославлявши.
Радуйтесь, на Господа Единого упование свое возлагавши.
Радуйтесь, святии мученицы Кодрате, Викторе и Галино, в страданиях тяжких Христа прославлявши.

Кондак 3

Силою Вышняго укреплении и на подвиги Творцем благословении, святии Киприане, Дионисие, Анекте, Павле и Крискенте, в пустыню ко святому Кодрату приходили есте, в безмолвии, молитве и богомыслии пребывавшему. Вы же, вся наставления его в сердцах своих слагая, Богу воспевали есте: **Аллилуиа.**

Икос 3

Имуще велию любовь к Богу, святии жены Галино, Хариессо, Нунехие, Василисо, Никие и Феодоро, купно с мужами благочестивыми, взявши крест, за Христом последовали есте. Таковое благоразумие ваше воспевая, восхваляем вас:
Радуйтесь, девы, невестами Христовыми наименовавшиися.
Радуйтесь, жены, благочестием исполнении.
Радуйтесь, Единому Господу жизни своя посвятивши.
Радуйтесь, красоту душ и телес ваших Творцу подарившии.
Радуйтесь, чистотою непорочною души своя украсившии.
Радуйтесь, венцами нетленными главы своя увенчавшии.
Радуйтесь, святии мученицы Кодрате, Викторе и Галино, в страданиях тяжких Христа прославлявши.

Кондак 4

Бурею злобною весь исполнен бысть нечестивый Иасон, повелевающи ти, святе Кодрате, Господа своего отректися и идолом мерзким жертву воздати. Ты же, даже до смерти, Господу верным пребыл еси, в страданиях своих Ему душею воспевая: **Аллилуиа.**

Икос 4

Слышав от тебе, мучениче Христов Кодрате, словеса премудрыя не страшитися мучений лютых и твердо за веру во Христа стояти, ученицы твоя душою укрепляхуся, да безбоязненно страдания за Господа примут. Сего ради, ублажаем вас хвалениями сими:
Радуйтесь, доблии и неустрашими воины Христовы.
Радуйтесь, гонений тяжких от врагов не убоявшиися.
Радуйтесь, в страданиях своих на Господа взиравшии.
Радуйтесь, укрепление от Него приимшии.
Радуйтесь, ангелами Божиими охраняемии.
Радуйтесь, чрез мучения своя сладость райскую познавшии.
Радуйтесь, святии мученицы Кодрате, Викторе и Галино, в страданиях тяжких Христа прославлявши.

Кондак 5

Богпротивное веление нечестиваго Иасона исполняя, воины мучеников Христовых на растерзание диким зверем бросаху, обаче зверие ноги святым лизаху и зла им не творяху. Таковое чудо на вас видевше, восхваляем Бога: **Аллилуиа**.

Икос 5

Видяще врази ваши, святии мученицы, яко не можаху вам ничесоже зверие сотворити, нози ваша к колеснице привязаху и по граду за колесницами влачаху. Вы же, главы своя об камене ударяя, Главе Церкви, Иисусу Христу, в жертву святую себе приносили есте, да людие во умилении сердечнем воспевают вам сице:

Радуйтесь, страданиями своими Христа прославлявшии.

Радуйтесь, мучениями своими ангельския лики умилявшии.

Радуйтесь, яко подвигами своими слабыя в вере укрепляли есте.

Радуйтесь, яко венцы от Господа стяжали есте.

Радуйтесь, защитницы наши неборимии.

Радуйтесь, помощницы наши незримии.

Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 6

Троповедницы истины Христовой явилися есте, доблии мученицы Христовы, посреди неверных, идольским светом ослепленных, свет истинныя веры источая, да узрят вся концы вселенныя Подателя Света невечерняго, иже просвещает вся языцы, и воспоят Ему песнь славы: **Аллилуиа**.

Икос 6

Возсияли есте, яко звезды пресветлии, драгоценнии мученицы наша, егда на месте казни молитве предавахуся и главы своя прекрасныя под мечи мучителей склоняху. Таковое велие мужество ваше зряще, прослави вас Господь: идеже бысть земля обагрена святою кровию вашею, явися источник чистыя воды, от негоже мнозии исцеление прияша. Сего ради, примите похвалы сия от нас:

Радуйтесь, безбоязненно за Господом шедшии.

Радуйтесь, тесным путем в Царствие Небесное вшедшии.

Радуйтесь, Единому Господу в мире сем потрудившиися.

Радуйтесь, мзду велию от Того за труды своя приявшии.

Радуйтесь, жемчужину дражайшую, Христа Господа, нашедшии.

Радуйтесь, паче всех богатств земных Творца возлюбившии.

Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 7

Хотя Господу своему подражати в страданиях Его, инии ученицы твои, святе Кодрате, за Христа такожде пострадаху, да с тобою купно в Царствии Небеснем воспоят Ему

немолчно: **Аллилуиа.**

Икос 7

Новых мучеников яви вас Христос людем Своим, да страданиями вашими, мученицы преславнии, вси сущии и ныне в вере православней укрепляются, восхваляя вас званиями сими:

Радуйтесь, Викторе, Викторине и Никифоре, в каменной ступе смерть свою приявшии.

Радуйтесь, тою смертию жестокою спасение стяжавшии.

Радуйтесь, Папие и Леониде, в волнах морских утоплении.

Радуйтесь, море страстей страданиями своими иссушившии.

Радуйтесь, Клавдие, Серафione и Дионисие, чрез мечное посечение и ножное заколение жизнь вечную улучившии.

Радуйтесь, муки претерпевшии, в них же козни злолукавыя посекавшии.

Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 8

Странно видети вас во славе, мученицы блаженнии, неверующим людем во Христа; вы же за Господа кровь свою проливая и жития своего не жалея, увенчании страданиями своими в Царствие Божие вошли есте, воспевая Царю Славы: **Аллилуиа.**

Икос 8

Весь Сладчайший Иисус Христос сладость и желание вам бысть, святых жены, за Него же купно с мужами своими тяжкия страдания претерпели есте. Сего ради, мужество ваше восхваляя, славословим вас:

Радуйтесь, Хариессо и Нунехие, вслед за мужами на мучения потекшии.

Радуйтесь, купно с теми славу себе стяжавшии.

Радуйтесь, Василисо и Нико, добровольно кровию своею телеса своя обагрившии.

Радуйтесь, тою кровию души своя от скверных очистившии.

Радуйтесь, Галино и Гали, Христу себя в жертву непорочную принесшии.

Радуйтесь, тою жертвою вся своя прегрешения искупившии.

Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 9

Все естество ангельское возрадовася зело, видяще сколь велие число душ праведных на небеси водворяется и Творцу покланяется, воспевая Ему сладце: **Аллилуиа.**

Икос 9

Ветии многовещаннии не возмогут достойно восхвалити ваши за Христа страдания и светлую кончину вашу, мученицы преблаженнии. Мы же, своими нечистыми устами дерзаем воспевати вам сицевая:

Радуйтесь, наши теплии пред Господем ходатаи.
Радуйтесь, присно за нас Творца молящии.
Радуйтесь, в Царствие Небесное нам вход отворяющии.
Радуйтесь, своим предстательством нас от бед защищающии.
Радуйтесь, души наша и телеса безмездно врачующии.
Радуйтесь, в различных обстояниях нас укрепляющии.
Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 10

Спастися хотящим благий пример подаете, мученицы крепции, терпением бо вашим в перенесении страданий за имя Божие, укрепляемся и восхваляем Господа: **Аллилуиа.**

Икос 10

Царю Небесному Единому угодити желая, души своя святых в руке Его всецело предали есте, святии мученицы. Сего ради примите от нас похвалы сия:
Радуйтесь, Господа Единого возлюбившии.
Радуйтесь, души своя Ему уневестившии.
Радуйтесь, чистым житием Богу угождавшии.
Радуйтесь, пути инаго, кроме теснаго, не знавшии.
Радуйтесь, волю свою воле Господа подчинявшии.
Радуйтесь, с Господом ничесоже не страшившиися.
Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 11

Пение ангельское ныне слышите на небеси, всехвальнии мученицы, зряще на Престоле сидящим Творца Жизнодавца и вопиюще Ему: **Аллилуиа.**

Икос 11

Света Податель, Господь и Творец, в Царствии Своем, яко други Своя, вас, мученицы славнии, трапезою небесною питает. Молитесь за ны, да и мы сподобимся со Господом вкушати от щедрот Его, вы же примите моления наша:
Радуйтесь, Кодрате и Никифоре, да и мы радости вашей причастицы будем.
Радуйтесь, Викторе и Викторине, да и мы с вами в любви Господа пребудем.
Радуйтесь, Папии и Леониде, да и мы с вами внидем в радость Господа своего.
Радуйтесь, Клавдие и Серафимоне, да и мы с вами будем Господа непрестанно восхваляти.
Радуйтесь, Киприане и Дионисие, да и мы с вами наследия небеснаго сподобимся.
Радуйтесь, Крискенте и Диодоре, да и мы с вами Пресвятей Троице будем присно поклоняться.
Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 12

Благодать, данную вам от Бога, недужных исцеляти, немощных врачевати, скорби утоляти, сведуще, к молитвенному заступлению вашему, святии мученицы, неустанно прибегаем и вопием Христу: **Аллилуиа**.

Икос 12

Поюще чудеса и милости ваша, святии мученицы Божии, хвалим вас вси, яко усердных молитвенников за нас пред Престолом Божиим, благодарно покланяемся вам, и умиленно вопием:

Радуйтесь, Хариессо и Нунехия, на Господа смиренно уповавшии.

Радуйтесь, за любовь ко Творцу, Господом возлюбленнии.

Радуйтесь, Василиссо и Нико, заповеди Господни и в скорбех сохранившии.

Радуйтесь, благодать Божию с радостию и любовию приимшии.

Радуйтесь, Галино и Феодоро, благоволение Отца Небеснаго испросившии.

Радуйтесь, усердно о Господе потрудившиися.

Радуйтесь, святии мученицы Кодрате, Викторе и Галино, в страданиях тяжких Христа прославлявшии.

Кондак 13

О, святии и достохвальнии мученицы Христовы, Кодрате, Викторе и Галино, и иже с вами купно за Христа пострадавшии! Примите сие хвалебное пение наше и благоприятными вашими молитвами избавите нас от всяких бед и обстояний, от мучений вечных сохраните и быти достойными Царствия Божия Господа умолите, да воспевати присно Ему будем: **Аллилуиа**.

Сей кондак читается трижды. Затем икос 1 и кондак 1.